



ҚАЗАҚСТАН ҰЛТТЫҚ БАНКІ

АҚПАРАТТЫҚ ХАБАРЛАМАЛАР

2016 жылғы 17 қараша

ҚР Ұлттық Банкі ақша нарығындағы нарықтық пайыздық мөлшерлемелерді қалыптастыруға баса назар аударады

Ұлттық Банк жұмысының негізгі басымдығы ақша нарығындағы нарықтық пайыздық мөлшерлемелерді қалыптастыруға бағытталған, бұл экономикадағы ақшаның объективтік бағасын айқындауға мүмкіндік береді. Бұл туралы ҚР Ұлттық Банкінің Төрағасы Д. Ақышев бүгін Қазақстан Республикасы Парламентінің Сенатында «2017 – 2019 жылдарға арналған республикалық бюджет туралы» заң жобасы бойынша сөз сөйлеген кезде хабарлады.

«Онсыз банктердің нарықтық талаптармен нақты секторды кредиттеуі мүмкін емес», – деп атап өтті ол, сонымен қатар 2016 жылғы 14 қарашада Ұлттық Банктің базалық мөлшерлемені 12%-ға дейін төмендеткенін еске түсірді.

Ұлттық Банктің басшысы хабарлағандай, 9 айда ақша массасы 11,5%-ға немесе 2,0 трлн. теңгеге ұлғайды (19,2 трлн. теңгеге дейін). Ол «экономикадағы ақша ұсынысының ең алдымен теңге бөлігінде өсіп келе жатқанын» нақтылады. Тұтастай алғанда, оның айтуынша, экономика ақшамен қамтамасыз етілген, теңге тапшылығы байқалмайды. Жыл басынан бері монеталандыру деңгейі 42,1%-дан 44,5%-ға дейін өсті.

Сонымен бірге Ұлттық Банктің деректері бойынша, ақша нарығында теңгемен өтімділіктің құрылымдық профициті сақталып отыр. «Ұлттық Банк сұранысқа ие теңгемен құралдарды шығарады және олардың базасында кірістілік қисығы қалыптастырылады. Бұл жағдай теңгемен ресурстардың әділ бағасын айқындауға мүмкіндік береді, бұл теңгемен кредиттеуді қайта бастауға қажетті талап болып табылады», – деп атап өтті Д. Ақышев.

Д. Ақышев макроэкономикалық тұрақтылықты қамтамасыз етудің негізгі факторын атап өтті

Ұлттық Банк «2017 – 2019 жылдарға арналған республикалық бюджет туралы» Қазақстан Республикасы Заңының жобасындағы өлшемдерді қолдайды. Бұл жөнінде бүгін ҚР Парламентінің Сенатында сөз сөйлеген кезде ҚР Ұлттық Банкінің Төрағасы Д. Ақышев хабарлады.

«Ағымдағы жағдайларда макроэкономикалық тұрақтылықты қамтамасыз етудің негізгі факторы Ұлттық Банктің ақша-кредит саясатын және Үкіметтің фискалды саясатын үйлестіру болып табылады, – деді ол. – Сондықтан таяу жылдарға арналған макроэкономикалық өлшемдер бірлесіп пысықталып, оларды Ұлттық Банк қолдайды».

Д. Ақышев сондай-ақ Ұлттық Банктің негізгі басымдығы жылдық инфляцияны 8% шегінде белгіленген дәлізде жылдам тұрақтандыру болып табылатынын атап өтті.

Қаржы реттеушісінің басшысы хабарлағандай, 2016 жылғы қазанның қорытындысы бойынша инфляция 0,6%, ал жыл басынан бері 6,2% деңгейінде қалыптасты, бұл дағдарысқа дейінгі кезеңнің көп жылдық мәндеріне сәйкес келеді.

2016 жылғы 9 айда берілген кредиттердің көлемі 525 млрд. теңгеге ұлғайды - Д.Ақышев

Банктердің экономикаға кредиттерінің қалдығы ағымдағы жылы өзгерген жоқ – 12,7 трлн. теңге. Алайда, 2016 жылғы 9 айда берілген кредиттердің көлемі 525 млрд. теңгеге ұлғайып, 7,2 трлн. теңге болды. Бұл жөнінде бүгін ҚР Парламентінің Сенатында сөз сөйлеген кезде ҚР Ұлттық Банкінің Төрағасы Д. Ақышев хабарлады.

Ұлттық Банк басшысы сондай-ақ теңгемен берілген кредиттер бойынша сыйақы мөлшерлемелерінің қаңтардағы 23,7%-дан қыркүйекте 16,3%-ға дейін төмендегенін атап өтті.

«Ұлттық Банк қаржылық тұрақтылықты қамтамасыз ету жұмысын жалғастыратын болады. Ел экономикасындағы дағдарысты құбылыстар сақталған жағдайда Ұлттық Банк қаржы нарығын реттеудің қарсы циклдық сипатын ұстанады, банк секторының жағымсыз жағдайларға орнықтылығына үнемі бағалау жүргізетін болады», – деп қорытындылады Д. Ақышев.

Қосымша ақпаратты мына телефон бойынша алуға болады:

+7 (727) 2704 585

e-mail: press@nationalbank.kz

www.nationalbank.kz